

I. კრედიტების აღიარების პრინციპები. ივანე ჯავახიშვილის სახელობის თბილისის სახელმწიფო უნივერსიტეტში (შემდგომში: უნივერსიტეტი) საქართველოს სხვა აკრედიტებული უმაღლესი საგანმანათლებლო დაწესებულებებიდან (შემდგომში: პირველადი უსდ) მობილობის ფარგლებში გადმოსული/აღდგენილი სტუდენტების (შემდგომში: სტუდენტი) კრედიტების აღიარება ექვემდებარება შემდეგ პრინციპებს:

1. ტრანსფერისა და დაგროვების ევროპულ საკრედიტო სისტემასთან (ECTS) შესაბამისობა;
2. სტუდენტის მიერ არჩეულ უმაღლეს საგანმანათლებლო პროგრამასთან შესაბამისობა და თავსებადობა;
3. საუნივერსიტეტო კურიკულუმთან შესაბამისობა და თავსებადობა (ეს ეხება ე. წ. თავისუფალ კრედიტებს).

II. კრედიტების აღიარების პროცედურა. თითოეულ ფაკულტეტზე, დეკანის ინდივიდუალური ადმინისტრაციულ-სამართლებრივი აქტით, ერთი წლის ვადით იქმნება კრედიტების აღიარების საფაკულტეტო კომისია (შემდგომში: კომისია), ან კომისიები, ფაკულტეტის სპეციფიკიდან გამომდინარე, რომელშიც შედიან:

1. შესაბამისი საგანმანათლებლო პროგრამის ხელმძღვანელი/კოორდინატორი და/ან მის მიერ რეკომენდებული პირი/პირები (აკადემიური პერსონალი ან ხელშეკრულებით მოწვეული, შესაბამისი დარგობრივი კვალიფიკაციის მქონე პირი);
2. ფაკულტეტის სასწავლო პროცესის მართვის სამსახურის წარმომადგენელი/წარმომადგენლები;
3. ფაკულტეტის ხარისხის უზრუნველყოფის სამსახურის წარმომადგენელი/წარმომადგენლები;
4. ფაკულტეტის აკადემიური და ადმინისტრაციული პერსონალის სხვა წარმომადგენლები ფაკულტეტის დეკანის გადაწყვეტილებით.

კომისია იკრიბება საჭიროებისამებრ. კომისიის საქმიანობას წარმართავენ მისი თავმჯდომარე და მდივანი. ამ უკანასკნელს ევალება სხდომების ოქმის წარმოება. კრედიტების აღიარების თაობაზე გადაწყვეტილება მიიღება სხდომის მონაწილეების ხმათა უბრალო უმრავლესობით.

კომისიის დასკვნას ხელს აწერენ კომისიის თავმჯდომარე, კომისიის წევრები და მდივანი (იხ. ფორმა 1). კომისიის დასკვნის საფუძველზე ფაკულტეტის დეკანი უნივერსიტეტის რექტორის სახელზე ამზადებს წარდგინებას კრედიტების აღიარების თაობაზე.

კომისიის საქმიანობასთან დაკავშირებული საორგანიზაციო საკითხების მოგვარება და სტუდენტთა კრედიტების აღიარებასთან დაკავშირებული დოკუმენტაციის მომზადება ევალება სასწავლო პროცესის მართვის სამსახურს.

სტუდენტის მიერ წარმოდგენილ ნიშნების ფურცელში სასწავლო კურსის სახელწოდება მითითებული უნდა იყოს სრულყოფილად და გარკვევით. სათანადოდ

დამოწმებული ნიშნების ფურცელი წარმოდგენილი უნდა იყოს ნაბეჭდი სახით. მითითებული უნდა იყოს ის კონკრეტული უცხოური ენა, რომელიც გავლილი აქვს სტუდენტს.

თუ სტუდენტის მიერ წარმოდგენილი დოკუმენტაცია არასრულია ან არ ითვალისწინებს ზემოაღნიშნულ მოთხოვნებს, კომისია უფლებამოსილია, სტუდენტს არ უღიაროს კრედიტები.

სტუდენტებს უღიარდებათ:

ა) ე. წ. საფაკულტეტო საგნების კრედიტები (იგულისხმება ის საფაკულტეტო საგნები, რომლებიც სტუდენტს ანიჭებს ამა თუ იმ აკადემიური ხარისხის მისაღებად საჭირო ზოგად დარგობრივ კომპეტენციებს. მაგალითად, ჰუმანიტარულ, საბუნებისმეტყველო, სოციალურ მეცნიერებათა ბაკალავრი და სხვ.);

ბ) სტუდენტის მიერ არჩეული ძირითადი საგანმანათლებლო პროგრამის კრედიტები;

გ) ე. წ. თავისუფალი კრედიტები (ე. წ. თავისუფალ კრედიტად შეიძლება აღიარებულ იქნას მხოლოდ ისეთი სასწავლო კურსი, რომლის ეკვივალენტიც არსებობს უნივერსიტეტის კურიკულუმში, ანუ უნივერსიტეტის ფაკულტეტების საგანმანათლებლო პროგრამებში. სათანადო ინფორმაციის მოპოვება შესაძლებელია უნივერსიტეტის ვებ-გვერდზე, ან შესაბამისი ფაკულტეტის ხარისხის უზრუნველყოფის სამსახურში);

ვინაიდან ე. წ. თავისუფალ საგნებად მიჩნეული სასწავლო კურსების კრედიტების რაოდენობა შეიძლება ასაღიარებელი კრედიტების რაოდენობაზე მეტი იყოს, კომისია ამ სასწავლო კურსების ჩამონათვალიდან ირჩევს იმ სასწავლო კურსებს, რომლებშიც სტუდენტს ყველაზე მაღალი შეფასებები აქვს მიღებული. სტუდენტის მოთხოვნის საფუძველზე შესაძლებელია, აღიარებულ იქნას არა უმაღლესი შეფასებების მქონე, არამედ სტუდენტის მიერ გავლილი სხვა სასწავლო კურსი/კურსები გადმოყვანის წესით სტუდენტის ჩარიცხვის შესახებ რექტორის ინდივიდუალური ადმინისტრაციულ-სამართლებრივი აქტის პროექტის გაგზავნამდე სსიპ განათლების აკრედიტაციის ეროვნულ ცენტრში.

სტუდენტს შესაძლებელია, გაეწიოს რეკომენდაცია, თუ რომელ დამატებით (ე. წ. minor) საბაკალავრო პროგრამას შეესაბამება მისი ე. წ. თავისუფალი კრედიტები.

იმ შემთხვევაში, თუ ბაკალავრიატის სტუდენტს სურს დამატებითი (ე. წ. minor) პროგრამის გავლა, რამაც შეიძლება გამოიწვიოს აღიარებული კრედიტების რაოდენობის ცვლილება, მაშინ გადმოსულმა სტუდენტმა შესაბამისი განცხადებით უნდა მიმართოს ფაკულტეტის დეკანს.

III. კრედიტების აღიარების რეგულაციები:

1. მას შემდეგ, რაც ამოქმედდება უმაღლესი განათლების კვალიფიკაციათა ჩარჩო და საქართველოს უმაღლესი საგანმანათლებლო დაწესებულებების კურიკულუმები დაეფუძნება სწავლის შედეგებს, შესაბამის დარგობრივ და ზოგად (ტრანსფერულ) კომპეტენციებს, სასწავლო კურსების კრედიტების აღიარება მოხდება სწავლის

მიზნებიდან და შედეგებიდან გამომდინარე, სტუდენტის მიერ გავლილი სასწავლო კურსების სილაბუსების ანალიზის შედეგად.

2. უმაღლესი განათლების კვალიფიკაციათა ჩარჩოს ამოქმედებამდე, კომისია უფლებამოსილია, საჭიროების შემთხვევაში სტუდენტს მოსთხოვოს მის მიერ გავლილი სასწავლო კურსების სილაბუსები. სილაბუსების მოთხოვნა არ ვრცელდება აღდგენილ სტუდენტებზე.

3. უმაღლესი საგანმანათლებლო პროგრამის კრედიტები, რომელთა საფუძველზეც განხორციელდა კვალიფიკაციის მინიჭება, არ შეიძლება აღიარებულ იქნეს სხვა საგანმანათლებლო პროგრამის მიზნებისთვის, გარდა დიპლომირებული სპეციალისტის საგანმანათლებლო პროგრამის ფარგლებში მიღებული კრედიტების ბაკალავრიატის საგანმანათლებლო პროგრამის მიზნებისთვის აღიარებისა.

4. თუ სტუდენტის მიერ გავლილი სასწავლო კურსის დასახელება და კრედიტების რაოდენობა ემთხვევა უნივერსიტეტში მოქმედი სასწავლო კურსის დასახელებასა და კრედიტების რაოდენობას, მაშინ ამ სასწავლო კურსის აღიარება ხდება ავტომატურად.

5. თუ სტუდენტის მიერ გავლილი სასწავლო კურსის კრედიტების რაოდენობა აღემატება უნივერსიტეტის შესაბამისი სასწავლო კურსის კრედიტების რაოდენობას, მაშინ ხდება იმდენი კრედიტის აღიარება, რამდენსაც ითვალისწინებს უნივერსიტეტის მოქმედი კურიკულუმი (მაგალითად, თუ სტუდენტს მოსმენილი აქვს ესა თუ ის 10 კრედიტიანი კურსი, ხოლო უნივერსიტეტში ანალოგიური კურსი 5 კრედიტიანია, მაშინ სტუდენტს უღიარდება მხოლოდ 5 კრედიტი).

6. თუ სტუდენტის მიერ გავლილი სასწავლო კურსის კრედიტები 1 ან 2 კრედიტით ნაკლებია უნივერსიტეტის შესაბამისი საგნის კრედიტებზე, მაშინ ამ სასწავლო კურსის აღიარების საკითხს წყვეტს კომისია სასწავლო კურსის სილაბუსით გათვალისწინებული სწავლის მიზნებისა და შედეგების ანალიზის საფუძველზე. აღნიშნული სასწავლო კურსის აღიარების შემთხვევაში, კომისია სტუდენტს კრედიტებს უღიარებს იმ რაოდენობით, რა რაოდენობითაც მას ეს საგანი გავლილი აქვს პირველად უსდ–ში. თუ ამ შემთხვევაში სტუდენტს დააკლდება საგანმანათლებლო პროგრამით სავალდებულო საგნებისათვის გათვალისწინებული კრედიტების რაოდენობა, მისი შევსება შესაძლებელია არჩევითი ან ე. წ. თავისუფალი საგნების ხარჯზე.

7. თუ სტუდენტის მიერ გავლილი სასწავლო კურსის დასახელება არ ემთხვევა უნივერსიტეტის სასწავლო კურსების დასახელებას, კომისია უფლებამოსილია, ზოგადი ხასიათის საგანი სტუდენტს უღიაროს, როგორც შესაბამისი დარგის, სპეციალობის შესავალი (მაგ. “სოციოლოგია” როგორც “შესავალი სოციოლოგიაში”), ხოლო სპეციფიკური საგნების აღიარება შეიძლება მოხდეს ფაკულტეტის შესაბამისი მიმართულების კურიკულუმის საგნებთან თემატური, შინაარსობრივი შეთავსების საფუძველზე (მაგ. “თანამედროვე პოლიტიკური სისტემა” შეიძლება აღიარებულ იქნას როგორც “შედარებითი პოლიტიკა” და სხვ.).

8. თუ სტუდენტს გავლილი აქვს მეორე უცხოური და/ან კლასიკური ენა, კომისიის გადაწყვეტილებით, შესაძლებელია, მეორე უცხოური და/ან კლასიკური ენის კრედიტები აღიარებულ იქნას ე. წ. თავისუფალ კრედიტებად.

9. თუ სტუდენტს უნივერსიტეტის კურიკულუმთან თავსებად რომელიმე საგანში მიღებული აქვს ე. წ. “დიფერენცირებული ჩათვლა”, მაშინ ხდება მისი აღიარება და შესაბამისი ქულის მითითება შეფასების 5 ბალიანი სისტემის 100 ქულიან სისტემაზე გადაყვანის პრინციპების შესაბამისად.

10. შეფასების 5 ბალიანი სისტემის 100 ქულიან სისტემაზე გადაყვანა ხდება შემდეგი პრინციპით:

ფრიადი (5)	91 ქულა	A
კარგი (4)	84 ქულა	B
დამაკმაყოფილებელი (3)	69 ქულა	D

11. ე. წ. არადიფერენცირებული “ჩათვლის” აღიარება ხდება მხოლოდ უნივერსიტეტიდან გარიცხული და აღდგენილი სტუდენტების, აგრეთვე ოკუპირებულ ტერიტორიებზე მიღებული განათლების აღიარების შემთხვევაში. ე. წ. არადიფერენცირებულ “ჩათვლას” ენიჭება პირობითი ქულა: სტუდენტის მიერ ყველა საგანში მიღებული ქულების საშუალო არითმეტიკული (მთელ რიცხვამდე დამრგვალებული).

12. თუ სტუდენტის პირველადი უსდ იყენებს არა ECTS კრედიტებს, არამედ კრედიტების მინიჭების განსხვავებულ სისტემას, სტუდენტი ვალდებულია წარმოადგინოს პირველადი უსდ–ს მიერ გაცემული ოფიციალური დოკუმენტი, რომელიც განმარტავს ამ სისტემის შესაბამისობას ტრანსფერისა და დაგროვების ევროპული საკრედიტო სისტემა (ECTS) სისტემასთან.

13. თუ სტუდენტის პირველად უსდ–ს არ გააჩნია სასწავლო კურსებისთვის კრედიტების მინიჭების სისტემა, მაშინ სტუდენტი ვალდებულია, წარმოადგინოს პირველადი უსდ–ს მიერ გაცემული სასწავლო ბარათი (ოფიციალური დოკუმენტი), რომელშიც მითითებული იქნება: თითოეული სასწავლო კურსის მოცულობა (რამდენი კვირის მანძილზე სწავლობდა სტუდენტი ამ სასწავლო კურსს და კვირაში რამდენი საათი ეთმობოდა მას). აღნიშნული კურსებისთვის ხდება პირობითი კრედიტების მინიჭება შემდეგი სისტემის მიხედვით: თითოეული სასწავლო კურსის საკონტაქტო საათებს ემატება დამოუკიდებელი მუშაობის საათები (საკონტაქტო საათების გამრავლებით კომისიის მიერ დადგენილ კოეფიციენტზე: 1,5–ზე ან სხვა ციფრზე) სასწავლო პროგრამის სპეციფიკის გათვალისწინებით, ხოლო საათების მიღებული რაოდენობა იყოფა 25–ზე, ანუ 1 კრედიტის საათების რაოდენობაზე. აღნიშნული წესით დაანგარიშებული არამთელი კრედიტები დამრგვალდება მთელ რიცხვამდე.

14. თუ სტუდენტის პირველადი უსდ იყენებს შეფასების არა 100 ქულიან, არამედ განსხვავებულ სისტემას, სტუდენტი ვალდებულია, წარმოადგინოს პირველადი

უსდ–ს მიერ გაცემული ოფიციალური დოკუმენტი, რომელიც განმარტავს ამ სისტემის შესაბამისობას შეფასების 100 ქულიან სისტემასთან.

15. აღდგენილი სტუდენტების მიერ გავლილი სასწავლო კურსებისთვის კრედიტების მინიჭება ხდება აღნიშნული დოკუმენტის III მუხლის მე-12 პუნქტში მოცემული წესის მიხედვით.

16. აღდგენილი სტუდენტების შეფასების 5 ბალიანი სისტემის 100 ქულიან სისტემაზე გადაყვანა ხდება აღნიშნული დოკუმენტის III მუხლის მე-9 პუნქტში მოცემული წესის მიხედვით.

17. სტუდენტების კრედიტების აღიარებასთან დაკავშირებულ საჩივრებს განიხილავს უნივერსიტეტის ხარისხის უზრუნველყოფის სამსახური, შეიმუშავებს შესაბამის რეკომენდაციებს და წარუდგენს კომისიას.

IV. სემესტრის განსაზღვრა აღიარებული კრედიტების მიხედვით: აღიარებული კრედიტების რაოდენობიდან გამომდინარე სტუდენტს ეძლევა რეკომენდაცია, სწავლა განაგრძოს შესაბამისი სემესტრიდან:

აღიარებული კრედიტი	შესაბამისი სემესტრი
0 - 19	I სემესტრი
20 - 49	II სემესტრი
50 - 79	III სემესტრი
80 - 109	IV სემესტრი
110 - 139	V სემესტრი
140 - 169	VI სემესტრი
170 - 199	VII სემესტრი
200 - 240	VIII სემესტრი

მედიცინის ფაკულტეტის სტუდენტებისათვის, ამ ფაკულტეტის კურიკულუმის სპეციფიკიდან გამომდინარე, მოქმედებს განსხვავებული წესი:

აღიარებული კრედიტი	შესაბამისი სემესტრი
0 - 24	I სემესტრი
25 - 54	II სემესტრი
55 - 8	III სემესტრი
85 - 114	IV სემესტრი
115 - 144	V სემესტრი
145 - 174	VI სემესტრი
175 - 204	VII სემესტრი
205 - 234	VIII სემესტრი
235 - 264	IX სემესტრი
265 - 294	X სემესტრი
295 - 324	XI სემესტრი
325 - 360	XII სემესტრი

საგანმანათლებლო პროგრამის სპეციფიკიდან, კურიკულუმის შემადგენელი სასწავლო კურსების წინაპირობებიდან და მათი გამოცხადების გრაფიკიდან, სტუდენტის ინდივიდუალური სასწავლო გეგმიდან გამომდინარე შესაძლებელია, მას დასჭირდეს დამატებითი სემესტრის (სემესტრების) გავლა.

აღიარებული კრედიტების მიხედვით სემესტრის განსაზღვრის მოცემული შკალა შეესაბამება სტუდენტის მიერ კრედიტების მოპოვების მოქმედ ნორმატიულ აქტებს და შეიცვლება მათი შეცვლის შემთხვევაში.